



A lokisetse Morena Sechaba se phethehileng. (Luka 1:17)

Tel: 28 350 466/ 62600983 (WhatsApp)

MOELETSI OA BASOTHO

PARARE DOMINO PLEBEM PERFECTAM




2

**Karabo e fihlile
Matlameng****Lekala le
matlafatsa kabo**

3



IEC E'A FONANISA

**Access Our Books on Akello Library!**Explore a wide range of our books anytime, anywhere.
Visit Akello Library today and start reading!

#ReadAnywhere #AkelloLibrary #ExploreMore

<https://library.akello.co/downloads>**Follow the link**

MOELETSI

Bohle ba be le seabo

Lesotho le se le hatetse pele haholo ntlheng ea ela hloko bophelo ba kelello boo hangata bo nkoang hasesane empa bo le bohlokoa, kaha booko kapa eona kelello e le eona e laolang sohle. Batlotlehi ba qeta ho bula Setsi sa Boiketlong Multipurpose seo morero oa sona e leng ho thoba mahlatsipa a tlikefetso. Setsi sena hoa utloahala se tla fana ka tlhabollo har'a tse ling tsa litšebeliso, 'me e tla ba sebaka se bolokehileng haholo ho mahlatsipa kaha a tla tseba ho bua litaba tsa ona ka bolokolohile a sa tšoha letho kapa hona ho ahloloa. Hape ona mahlatsipa a tla tseba ho buisana ka boona, 'me a thobane le ho tšelisana kaha ho le bobebe ho motho ea ileng a roala seeta ho utloisisa le ho tseba tsela eo habonolo.

Mona teng ehlile ho opuo khomo lenaka e le 'nete, empa ho setse feela hore ho thuse bahleleketsi le bona ka tlhobollo ho lesa liketso tsena tse sooto. Ka nako e 'ngoe ba etsa mesebetsi ena ea bona ka lebaka la khatello le liqholotso tseo ba tobanang le tsona ka malapeng, mona re bua ka banna bao e bang bona basireletsi le lihlooho tsa malapa. Hona joale tlala e patetse, ha ho bobebe hakaalo ho beha bohobe tafoleng ka hona ho tla ba le liqholotso tse qetellang li entse hore ho be le lintoa hobane lipuisano tse bang teng li apareloa ke maikutlo a mangata haholo. Ha e le mona ho ahiloe setsi molemong oa mahlatsipa e se e le hore ho shejoe hore na ho phekoloe bahleleketsi joang, kaha seo se tla fokotsa lipalo tsa mahlatsipa.

Komisi e Ikemetseng ea Likhetho (IEC) e leboha likomishinara tse ileng tsa sebetsa kathata tse eang phomolong, 'me e hetla morao ho sheba maputulo a tsona. Likomishinara tse tsoang li bontša li khotsofalletse tšebetso eo li e entseng molemong oa komisi; li fumantse komisi sebaka se tla boloka thepa ea eona ka makhethe e sireletsehlile. Ho feta mona ba re tšebeliso ea marang-rang e thusitse haholo tabeng ea ho atametsa le ho ntlafatsa litšebeliso. Le teng ho ntse ho hloka hore sechaba se rutoe haholo ka karolo eo se lokelang ho e bapala. Ke mona moo Mookameli oa IEC a itseng baselebetsi ba hloka ho fuoa lisebelisoa tse lokelang ka potlako hore litšebeliso ebe tse tsoileng matsoho. Ka hona a tšepisa hore komisi e tla lekola tšebetso ea eona mabapi le likampani tse fanoang ka lisebelisoa, le ho matlafatsa likamano tse ntle le mafapha a mang a 'muso.

Setsi sa Toantšo ea Bobolu le Bomenemene (DCEO) se butse ofisi e ncha ka boroa ho naha ho khaola sechaba maoto a ho tla Motse-Moholo ho tla tlaleha bobolu. Majantja, Makaota, Liphakoe le Melele ba se ba tlaleha haufi 'me sena se tla thusa tšebetsong haholo ea 'muso kaha e le hona moo tšenyō e bang teng haholo. Ha e le mona DCEO e se e le haufi mohlomong ba neng ba lutse moriting oa tebalo ba iketlile; ba itjella ba iphomoletse ba tla ba le letsoalo ebe litšebeliso li'a ntlafala. 'Musi oa Setereke sa Quthing o thabetse ofisi haholo kaha a bontša ha setereke sa habo se hlooa ke lintlafatso ka lebaka la bobolu bo iketsetsoang ke bapolotiki.

Mokhatlo oa Machaba oa Lisebelisoa tsa Boea (IWTO) ho hlaha linaheng tsa tikoloho ea Afrika o tšoare 'moka lekhetlo la pele Naheng ea Lesotho, ka sepheo sa ho thakelana ka malebela mabapi le tlhahiso ea boea ba farelane le seiboko. Naha ea Lesotho ka lihoai tsa eona e lokela ho ithuta hore na boea bona bo tsamaea joang mebarakeng ea machaba, kaha ho bonahala eka ka nako e 'ngoe bo sitoa ho fihlela linaheng tse ling. 'Moka ona o tla thusa lihoai ka lipatlisiso tse khinang thekiso ea boea, ebe ba tseba ho kata likoti le ho ntlafatsa tlhahiso hore e fihlele lipehelo tsa machaba.

Letona la Lichelete le Ntšetsopele ea Meralo le bontšitse hore naha e fumane batseteli ba tla aha lihotele Lesotho, ho thusa ho matlafatsa moruo, tsena o li buile nakong eo a neng a teka tlaleho ea mahareng ea lichelete. Le bontša hore ho ea ka tlaleho ea IMF ho lebeletsoe kholo e monyebe haholo ea moruo; 'me monongoaha ke tebello ke 3.2% ha isao e tla ba 3.1%. Leha e shebahala e le nyenyane hakaalo ke katleho ha ho papisoa le likhoeli tse fetileng. Letona le re 'muso o ntse o tsoelapele ho netefatsa hore moruo o leba liatleng tsa mafapha a ikemetseng. Sena o se fihletse ka lenaneo la Sebatatso se thusang bacha ho theha likhoebo le ho tšehetsa tse teng. Ho feta mona, lefapha la naha la merafo le ntse le tsoelapele ho etsa lithhophiso tse ileng tsa tsoala hore selemong se holimo, ho kenngoe tšebetsong morero oa Mosotho ea rafang ka peke le kharafu. Tsena tsohle li entsoe ka morero oa ho fokotsa likhoqetsane hore bohle ba be le seabo ntlafatsong ea moruo.

MOLIMO A BOLOKE LESOTHO LE BASOTHO

Karabo e fihlile Matlameng

Nthabeleng Seitlheko

Ele ho arabela qholotso ea tokiso ea litsela kahar'a metse le ho isa lintlafatso metseng Letona la Mesebetsi e Mehlo ea Sechaba le Lipalangoang le hlalositse mekonteraka e mene ho sechaba sa Matlameng e tlii'o lokisa tsela e khelohang Pitseng ho ea Matlameng Ha Koasa ka la 20 Pulungoana monongoaha.

Letona la Mesebetsi ea Sechaba le Lipalangoang, Mohlomphehi Matjato Moteane o hlalositse hore kamor'a hore ba etele metse eo likhoeli tse 'maloa tse fetileng, lekala la habo ka lefapha la litsela le ile la ikeletsa ho potlakela tšebetso ea tsela eo.

A bontša hore boipilaetso ba bo-ralikoloi bo ile ba bontša ka moo sechaba se halefileng ka teng hore le sona se fumane lintlafatso haholo tsa tsela kaha e le maemong e mabe hoo nakong ea lipula tse matla e sa tsamaeeng. A re ho latelela botelele ba tsela eona ba tlii'o hlalisa mekonteraka e mene e le hore e potlake, 'me bona ba tšepisitse ho tla nka nako ea likhoeli tse robeli ho e lokisa.

Moteane o bontšitse hore tšebetso ena e tlii'o thehela baahi ba fetang 40 mesebetsi, e ntse e le hore sechaba le sona se une molemo tokisong ea tsela. A re ho tla kenyetsetsa khaho ea borokho lipakeng tsa Matlameng le Ha Koasa, moo tlaleho e supang hore boholo ba sechaba bo nkuoa ke noka eo khafetsa ka lebaka la tlhokahalo ea borokho.

Ho sa le joalo, o laetse mekonteraka ho buseletsa sechabeng kahare ho libaka tseo ba il'o sebetsa ho tsona ka chelete e kaalo ka M25, 000.00, likolong tse tikolohong eo ka sohle seo ba tla khetha ho se etsa e le sa boleng ba chelete eo, mekonteraka ka mong.

A re tsela ena e tlii'o lokisoa e boikarabellong ba sechaba ho nena ho e senya ka mehoma le likosekara hobane ke tsona tse senyang tsela kapele ka ho e etsa mangope, ka hoo sechaba se e baballe hore e tle e se phelele nako e telele.

Moteane o supile hore tsela ena e tlii'o ba botelele ba likilomithara tse 39, 'me kakaretso ea chelete e tla sebelisoa ke bonyane M71 Million ho phethela tokiso ena.

O boetse a netefatsa sechaba hore kaha boholo ba tsela eo e tsamaea kahare ho metse e kopaneng eka e arohane, lekala la habo le ikelelitse ho tla kenya matšoao a tsela esita le mabone a khantšang tseleng motseng o mong le o mong, e ntse e le ho sebelisa semetho se secha sa tsela e nepahetseng.

Mokhethoa oa lebatooa la Mphosong, 'Mamokete Ntšekhe o bontšitse thabo ea bona e le e khaphatsehlang ha e le mona ba arabiloe kamor'a ho se fumane ntlafatso nako e telele.

A re se makatsang ke hore lilemong tse fetileng ho ne ho tloaelehile hore ebe ho ntse ho thoe tsela ea Matlameng e se e lokisitsoe empa ho se joalo, khetlong lena ba bua pale e ncha kaha ba sa joetsoe feela hore e tlii'o lokisoa empa ba fuoa mekonteraka e tla kena khabong ea tokiso.

O itse o tli'o ema ka maoto

ho netefatsa hore chelete e abetsoeng mekonteraka e sebetsa ho latela tebello ea lekala, e seng ho tla phoqa sechaba sa habo ka tsela e tla nka likhoeli eba e se senyeha.

A re mekonteraka e nene litloaelo tsa bona tse mpe tsa ho theha malapa moo ba sebetsang kaha seo se ama nako ea bona ea tšebetso, eba ba lieha ho phethela tokiso ea tsela ka nako e behiloeng.

Ntšekhe o bontšitse hore tsela ena e tlii'o bulela sechaba menyela ea mesebetsi, 'me tebello ea bona ke hore ba fuoang mesebetsi ba o etse ka boitelo le botšepahi.

Lebitsong la sechaba, 'Mathakane Rakuoane o lebohile mokhethoa oa bona hore ebe o ile a tsitlalela tšepiso ea hae ea ho se fele liofising tsa litsela ho ba tlela le karabo.

A re ke moo le bona ba tla bina sefela se secha, seo ho nkileng lilemo-lemo hore ba se bine ka lebaka la ho se fumane karabo tlhokong ea bona ea tsela e emeng lintlafatso tse ling pele.

A re ba sitoa ho fihlela litšebeliso ha bobebe ka lebaka la tsela e mangopehali, e rellang nakong ea lipula tse matla le hona ho roba likoloi tsa bona khafetsa.

Tokiso ea tsela ena, e fihla kamor'a hore sechaba sa Matlameng ka bo-ramakoloi se be boipelaetsong ka ho emisa motsamao e le hoba se lla ka tsela e seng e le maemong a hloabaetsang.



Contacts: +266 28350 466
62600983 WhatsApp
Email: newsroom@moeletsiobasotho.co.ls
Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1:17)

Editorial
Lesetsa Rakubutu
(+266) 6203 1949 / 58190670
EMAIL: editor@moeletsiobasotho.co.ls

Mohale Lehlohonolo (Sub-editor)
(+266) 58 771 507 / 62 771 507

Journalists
Nthabeleng Seitlheko 57 665 038/ 68 216 271
Tšeliso Thakholi 58 540 853/ 63 480 404

Production Desk: 'Mateele Liqa

Lekala le matlafatsa kabo ea toka

Nthabeleng Seitlheko

Lekala la Toka le Molao le ikelelitse ho tšoara 'moka o re-retsoeng ho tšohla mekhoea eo 'muso o ka e sebelisang ho tliša khotso ea moshoelella le ho thibela litlolo tsa molao. Litaba tsena li etsoa e le karolo ea ho matlafatsa litaba tsa kabo ea toka Makhotleng a Molao. Litaba tsena li hlaheletse 'mokeng oa bo-ralitaba, oa la 25 Pulungoana monongoaha.

Letona la Molao le Toka, Mohlomphehi Richard Ramoetsi o bontšitse hore khotso ha e se na toka e ke ke ea tliša litharollo tsa moshoelella ke ka hona 'muso o sebetsang ka thata ho bona hore linyeoe tse teng makhotleng li fumaneloa litharollo, ho abela mahlatsipa toka e le ho qoba boiphethetso bo sa eeng moriting eleng bona bo eketsang



sekhahla sa litlolo tsa molao kahar'a naha.

A re ba ikemiselitse ho sebetsa ho bona hore litlolo tsa molao li ea moriting kahar'a naha, 'me a ipiletsa ho Basotho bohle ho batla bokena-lipakeng moo likhohla-

no li le teng, kaha sena se tla ba thusa ho qoba litlolo tsa molao.

Ho feta mona, ea tšoereng molepo e le Mookameli Lefapheng le shebaneng le Litaba tsa Tlhopho-Bocha, Ntebaleng Morojele o

bontšitse hore 'moka ona o tlišoa ke ho tsetsela khotso ea moshoelella kahar'a naha esita le ho susumetsa bonngoe, kabo ea toka le poelano lipakeng tsa Basotho kaha e le tse ling tsa likhothaletso tse teng kahar'a

litaba tsa tlhopho-bocha.

A re leha ho le joalo, naha ena e ntse e salletse morao haholo ntlheng ea maano a ka sebelisoang hore batho ba ileng ba utloisoa bohloko le baetsi ba liketso tse joalo ba kopane hammoho, ho buisana ka se ka etsoang ho leballana litšito le mekhoea eo bahlekefetsi ba ka nkang boikarabello ka eona kantle le ho isoa ntloana-tšoana.

A re linaha tse ling li sebelisa maano a kang mananeo a puseletso le boitlamo ba poelano, ha tse ling li theha komiti ea lipatlisiso e khothalletsang bahlekefetsi ho lumela melato ea bona le ho fana kannete mabapi le se etsahetseng e le ho ona ho fola kapele.

A re mokhoa ona o thusa haholo ho felisa boiphethetso bo bang teng kamor'a litlolo tsa molao kaha bokena-lipakeng bona bo fihlela litharollo ka tsela e nang le ponaletso hobane mahlatsipa le bahlekefetsi ba bona ba fuoa monyetla oa ho ntša maikutlo.

DCEO e'a nama

Nthabeleng Seitlheko

Ele mohato oa ho matlafatsa ntoa khahlanong le bobolu lipakeng tsa sechaba sa Quthing, Mohale's Hoek, Qacha's Nek le Mafeteng; Setsi sa Toantšō ea Bobolu le Bomenemene Lesotho (DCEO) se butse ka molao ofisi e ncha ka la 21 Pulungoana monongoaha.

Mookameli oa Boto ea DCEO, Mpeo Moiloa Mahase o itse ho bohlokoa hore DCEO e atamele sechaba. A re ho buloa ha ofisi ena ke karolo ea leano le leholo la naha la ho atametša litšebeletso tsa puso ho sechaba, empa haholo-holo ho etsa bonnete ba hore litlolo tsa bobolu li etsetsoa lipatlisiso kapele.

A re sechaba se lokela ho utloa hore ha se sa le hore le litšebeletso tsena.

"Ha re sa tla utloa litlolo tsa hore batho ba hloka ho nka maeto a matelele ho ea beha litlolo tsa bona Maseru." A rialo.

A re Mohale's Hoek le libaka tse e potileng li se li e-na le sebaka sa ho isa lillo, ka hoo ke boikarabello ba bohle ho netefatsa hore litlolo li'a mameloa, li'a batlisisoa 'me batho ba etsang bobolu ba fuoe kotlo e ba tšoanelang.

A tsoelapele hore o hlokometse hore bobolu ha bo senyetse sechaba feela litšebeletsong, empa hape bo nyotobetsa moruo oa naha hape bo senya le menyetla ea bacha, ka hona a khothalletsa sechaba hore se se ke sa tšaba ho fana ka menenyetsi.

A re ho tlaleha bobolu ke ketso ea boitelo le ho nena bobolu, 'me eona ha e etsoe ke motho ea batlang ho phethahatsa thahasello ea hae, empa ke ketso ea ho boloka naha, malapa le

bokamoso ba bara le barali ba rona.

Mookameli oa DCEO, Adv. Brigadier Mantšō Sello o supile hore ho buloa ha ofisi ena ke ho fana ka tiisetso ea hore DCEO ha e ea ikemisetsa feela ho loantša bobolu, empa le ho fana ka leseli litabeng tsa puso.

A re bohle ba lokela ho utloisisa hore ka lilemo tse ngata sechaba se kile sa lahlehela ke tšepo litsing tsa puso, haholo ha ho tluoa tabeng ea ho sebetsana le botšephehi 'moho le litlolo tsa bobolu. "Ka hona, ofisi ena ke pontšo ea hore re khutlisetsa tšepo eo ka ketso eseng ka mantsoe feela." A li beha tjena.

Ho feta mona, o bontšitse hore basebetsi ba ofisi ea Mohale's Hoek ba tla sebetsa ka mafolo-folo ho etsa litlhalobo, ho bokella bopaki, ho fana ka likhothaletso tsa thibelo ea bobolu le ho ruta sechaba ka litokelo tsa sona.

A boela a supa hore linyeoe tse amang litšebeletso tsa sechaba, joalo-

ka likonteraka, tšehetso ea temo, lifolakha tsa bohahlauli le mekhoea ea thuto li tla fuoa tlhokomelo e khethehileng.

A re ha motho a bona chelete ea sechaba e sebelisoa hampe, likonteraka tse fapakaneng tse nkang nako e telele ho feta kamoo ho lokelang, a se ke a iphapanya. A re ba teng; mamati a butsoe 'me ba tla mamelela tšito e 'ngoe le e 'ngoe e nang le botebo.

Ka lehlakoreng le leng, lebitsong la babusi ba liter-eke tse ka boroa, 'Musi oa Setereke sa Quthing, Bonang Tlali o bontšitse a khotsofetse ke mohato ona, 'me a re sechaba sa lithabeng ha se'a lokela ho ikutloa se siuoa ka thoko.

A re ofisi ena e buloa hore ba bone hore libaka tsa Quthing, Qacha's Nek, Mohale's Hoek le Mafeteng li hloka tlhokomelo e potlakileng litabeng tsa matšoenyeho a bobolu.

A bontša hore Setereke sa Quthing, ke se seng sa libaka tse legemeng la litš-

beletso, 'me hangata se felloa ke menyetla ka lebaka la liketso tsa bobolu tse etsoang ke bo-ralipolotiki kapa basebetsi ba 'muso.

Mokhethoa oa Mohale's Hoek, Sizakele Mdlokovana o supile hore ho buloa ha ofisi ena ke katleho e kholo e tla unoa ke sechaba. A re kajeno h'a na karabo e 'ngoe ha e se hore menyako e se e butsoe; sechaba se tlalehe litlolo tsa molao hobane bobolu ha bo'a lokela ho pata mang kapa mang.

A re ho loantša bobolu ha se mosebetsi oa DCEO feela, empa ke mosebetsi o lokelang ho tšoarisoa o kenelle likolong, mekhatlong ea sechaba le hohle moo sechaba se bakaneng.

Tseba boemo

ba hau u

alafshoe



WIDE FORMAT PRINTING

We offer durable, affordable & quick turnaround wide format prints. We can provide multiple options for indoors and outdoor applications - as well as produce any size you can imagine

FOR YOUR FUTURE WE CARE

Call or whats App: +266 28350815/ 22350224/ 68078124 (Whats app)

Mazenod PRINTING WORKS (Pty) Ltd
Prepare good People for The Lord

BANNERS

SIGNS

POSTERS

PRINTS

MOELETSI O TŠEHETSA BACHA

Tšeliso Thakholi

Le rato Kobuoe ke mothehi oa khoebo e ntseng e hola e rekisang lihlahisoa tsohle tsa bohobe tse fapakaneng e bitsoang Thousand Hills Bakery and Pizzeria. Ke mocha ea ntseng a le monyenyanane haholo lilemong ea bonahalang a ipabola ka ho sebelisa litalenta tsa hae tse fapakaneng ho iphelisa lefapheng lena la khoebo e hlahisang bohobe, likuku le pizza e lutlisang mathe ke monate.

O re bolella ka moo a sebelisang litalenta tsa hae tse ngata tseo boholo ba tsona a ileng a li matlafatsa ka ho kena sekolo tse kang tsa mopheho, poloko ea libuka, litaba tsa lipapatso tsa lihlahisoa le ho rupela bacha empa eo a ikhethollang kahare ho tsona ebile a e rata ka pelo eohle ea hae ke mopheho.

MORERO



OA HO QALA

Ha ke tla qala khoebo ena ke ne ke qhololitsoe ke lintho tse ngata, empa har'a tsona morero o moholo oa ka ke hobane ke hotse ke le motho ea ratang khoebo haholo. Ke ha ke tla theha khoebo ena ho ipha monyetla oa ho matlafatsa litsebo tseo ke nang le tsona ka ho bulela bacha ba bang menyetla ea mesebetsi, ka ho sebelisa litsebo tseo ke nang le tsona. E kholo ka ho fetisisa e ne e boetse e le ho loantša leqeme la tlhokahalo ea mesebetsi le bonahalang le ntse le e-jasetsi kahare ho bacha. Ntho e ileng ea boela ea



nthokola hore ke tle ke qetelle ke e-na le morero ona oa ho ba le khoebo ke ne ke ithutile hore likhobong tse ling bareki ha ba

beletsi bo tsoileng matsoho.

KHETHO EA KHOEBO

Har'a likhoebo tseo ke ileng ka li rata tseo ke neng ke lumela hore nka tseba ho iphelisa le ho phelisa bacha ba bang ba heso ka tsona, ke ile ka khetha ena ea tlhahiso ea bohobe kaha ke ne ke hlokometse hore ha e hloke chelete e ngata hore motho a ka e qala, 'me e boetse e lumellana le lerato la ka la ho pheha kaha e hlile ke 'Chef' e leng sephehi se nang le litsebo tse ikhethang tsa ho pheha mefuta e fapakaneng ea lijo le bohobe.

Ka hlokomela hore khoebo ea bohobe e tla nthusa ho tsepamisa maikutlo a ka holima litsebo tseo ke nang le tsona, e le hore ke tle ke tsebe ho matlafatsa khoebo ea ka ea tlhahiso



ea bohobe le ho hlahisa pizza e monate ka ho fetisisa. Ke boetse ke khethile khoebo ena kaha e nthusa joalokaha ke se ke boletse pele, ho kopanya litsebo tsa ka le ho mpha monyetla oa ho fana ka lihlahisoa tsa boleng, ha ka nq'ena ke ntse ke leka ho hlahisa mesebetsi le ho matlafatsa bacha le basali kahare ho sechaba sa habo rona



hore ba tsebe ho ikemela le ho itlhalisetsa mesebetsi eo ba tla tseba ho phela ka eona.

LIHLAHISOA LE 'MARAKA

Re hlahisa mefuta eohle ea bohobe bo bosootho le bo bosoeu bo monate haholo, pizza, brownies, libane le likuku ka mefuta ea tsona. Hajoale 'maraka oa rona o moholo ke mabenkele a maholo, lipetlele,

lihotele, matlo a ho jela, likhoebo, lishopo tse ling tse fumanehang mona moo ho tšeloang likoloi, batho ba rekang ba il'o rekisa le batho ka bo mong.

MOKHOA OA HO FIHLA HO BAREKI

Ka thoko le hore ebe re se re ntse re fepela likhoebo le batho ka bongata ka lihlahisoa tsa rona; re na le mekhoe e meng e bobebe ea ho fihlela kapa ho hohelela bareki ba bacha ka ho ba romella mehlala ea lihlahisoa tsa rona ka ho sebetse le batho ba lipapatso le ho sebelisa marang-rang.

TORO EA KA

Ke lakatsa ho eketsa tlhahiso e le ho loantša bofuma; ho eketsa basebetsi bonyane ka batho ba 15, 'me hajoale ke sa na le ba bane e leng ba bararo bao e leng bacha le a mong e moholo. Ke rata ho pharalla le ho tlala naha.

KELETSO HO BACHA

Ke khothaletsa bacha ho kena khoebong ka matla a maholo, 'me ba se kene ba qala ka lintho tse hloakang lichelete tse boima, empa ba qale ka likhoebo tse tla ba lekana mesikaroro. Ba tsepamise maikut-

lo a bona holima likhoebo tsa bona ho ba ke ntho e boima haholo e batla 'mesa-mohloane ea sa panyeng. Taba e 'ngoe ea bohlokoa ke hore ba utloisise hantle 'maraka oa khoebo eo ba ratang ho e etsa, ho laola lichelete hantle tsa khoebo, ho ba le mamello ha ba kopana le liqholotso le ho ba le boitšepo ka seo ba batlang ho se etsa.

IEC e'a fonanisa le ho hetla morao

Nthabeleng Seithleko

Komisi e lke-metseng ea Likhetho (IEC) e hetla morao le ho tlotla tšebetso ea likomishinara tse behang meja fatše, ka la 25 Pulungoana monongoaha.

Mookameli oa IEC Adv. Mphaiphele Maqutu o supile hore ho hetla morao mosebetsing oa likomishinara ho bohlokoa haholo kaha ho tla thusa tse ling tse tlang ho nka mohlala le ho ntlafatsa tšebetso.

A re likomishinara ke tsona mahlo le litsebe tsa komisi metseng ea Basotho e bile ke tsona tse thusang komisi ho sebetsa ka matla le ho atamela seo Basotho ba se hlohang.


A re litlaleho tsa tsona li thusa IEC ho utloisisa mae-mo a 'nete libakeng haho-

boitelo bohle. A re ba tlameha ho kenya letsoho ho tloha hona joale ho netefatsa hore basebetsi ba bona ha ba sitisoe ke mathata ao ba ka a qobang ho fana ka litšebeletso tsa maemo.

O boletse hore komisi e tla lekola mehato ea ho matlafatsa tšebetso ea likampani tse fanang ka lisebelisoa, hammoho le ho aha tšebeliso e haufi le mafapha a mang a 'muso ho netefatsa hore likopo tsa basebetsi li arabeloa ka nako.

Ka lehlakoreng le leng e mong oa Likomishinara tse tsamaeang, Dr. Karabo Mokobocho Mohlakoana o hlalositse ba le motlotlo haholo kaha ho na le seo ba tsamaeang ba atlehile ho se etsa.

A re ha ho tluoa tabeng ea tšireletseho ea thepa ea komisi, ba sebelitse ka



litoro tse bolokang thepa ea komisi.

A totobatsa hore libaka tse bolokang thepa ea komisi kapa moo komisi e sebeletsang teng ho lokela ho sireletsehe e le ho etsa hore le basebetsi ba sebe-

le makhotla a sechaba ho netefatsa polokeho libakeng tsohle.

A re ba na le leano la ho beha balebeli ba lekaneng le ho kenya lisebelisoa; ho kenyeletsoa li-alamo, mabone le likamera. O ile a eketsa hore lisebelisoa tsohle tsa komisi li loke-la ho bolokoa ka mokhoa o lumellanang le melao ea tšireletso, e le hore li fumanehe habonolo ha mosebetsi o hloka ho potlakisoa.

Ka mokhoa o tšoanang komishinara e 'ngoe e tsamaeang e leng Tšoeu Petlane o hlalositse hore e 'ngoe ea litaba tseo ba ileng ba li fa leihlo ke tšebetso ea ho lokisa lenane la likhetho hobane ke oona motheo oa likhetho.

A bontša hore ho sa ntse ho e-na le liphepetso tsa ho netefatsa hore basebetsi ba bontša boitelo bo hlakileng ha ba sebetsa le

sechaba. O boletse hore batho ba bang ba haelloa ke litokomane tse nepahetseng kapa ha ba tsebe bohlokoa ba ho ntlafatsa mosebetsi ea bona, ka hoo ho hloka hahala matšolo a pharalletseng a thuto ea sechaba.

Petlane o itse mosebetsi oa komisi o moholo ke ho bona hore manane a likhetho a nepahetse le hore sechaba sohle se ba le monyetla oa ho khetha, 'me sena se ka etsahala ha feela thuto e fihletse sechabeng hantle.

A tiisa hore IEC e boetse e matlafalitse tšebeliso ea marang-rang ho kenyeletsoa litšebetso tsa ho kenya le ho boloka litaba tsa thuto ka mokhoa o sireletsehileng le o fumanehang kapele.

A boela a toboketsa bohlokoa ba tšebeliso lipakeng tsa komisi le sechaba ka kakaretso. A re moo sechaba se amehang ka kotloloho mosebetsing oa likhetho, mosebetsi o tsamaea ka botšephehi.

A re ba tsamaea tjena komisi e rerile ho eket-sa mananeo a puisano le sechaba, ho kenyeletsoa lipuisano metseng, Li-ea-le-moeeng le litaba tsa mecha ea litaba tsa sechaba: kaha sena se tla thusa hore batho ba ele hloko mosebetsi ea komisi le hore na ba ka kenya letsoho hokae.

Likomishinara tsena tse behang meja fatše li qalile tšebetso ka selemo sa 2020 'me tse kenang li lebelletsoe ho qala tšebetso ka khoeli ea Tšitoe monongoaha.



lo tabeng ea ho hlophisa mosebetsi oa basebetsi, ho boloka thepa ea komisi, ho ntlafatsa tšireletso le ho potlakisa tokiso ea lenane la bakhethi.

A re likomishinara tsena tse tsamaeang li fihletse likatleho tse ngata haholo joalo ka ho beha basebetsi ka pele, haholo ba sebitsang maamong a thata metseng e fihlillehang ka thata, kaha litlaleho li supa hore mosebetsi ea basebetsi ba mahaeng hangata e ka sitisoa ke khahello ea lisebelisoa tsa mantlha, likoloi le tšebetso ea marang-rang.

Maqutu o itse ha basebetsi ba sebetsa ka lisebelisoa tse nepahetseng, ba sebetsa ka botšephehi le ka

matla 'ohle hore komisi e be le 'moaho oo e leng oa eona IEC le hore ho be le

tse ka bolokolohi. A re komisi e boetse e phahamisitse tšebeliso le sepolesa



Mahlatsipa a aheloa lehae

Nthabeleng Seitlheko

Motlotlehi ‘Masenate Mohato Seeiso o tiisitse boitlamo ba Lesotho ba ho sireletsa basali le bana khahlanong le tthekefetso h’a ne a bula Setsi sa Boiketlong Multipurpose ka molao, ka la 24 Pulungoana monongoaha. Boiketlong ke setsi se et-selitsoeng ho ba bolulo ba tšireletso, phomolo le pholiso sebakeng sa basali le bana ba balehang likhohlano le tthekefetso malapeng. Setsi sena se tla fana ka bolulo ba nakoana tšehetso ea kelello le maikutlo (psychosocial support) le thuso ea molao.

Mofumahali o bontšitse kutloelo-bohloko le boikemisetso: “Ho bohloko haholo hore mahlatsipa a tthekefetso a utloisoe bohloko ke batho bao ba ba tšepileng. Ho thehoa ha setsi sena ke pontšo e matla ea hore



basali le bana ba tsoaneloa ke polokeho, seriti le qalo e ncha.” O boletse hore baemeli, mekhatlo le balekane ba eme ka maoto ho tšehetsa mahlatsipa a tthekefetso le ho leka ho aha bophelo bo bocha. Motlatsi oa Tona-Kholo, Justice Nthomeng Majara o entse kopo e matla ho sechaba ka bophara hore se kenelle ntoeng ea ho felisa tthekefetso ea bong (GBV). “Tthekefetso ea bong ha se bothata ba lelapa feela ke koluo ea naha e hlohang

ho loanoa hammoho.” Ho boletse Majara. Moemeli oa Machaba a Kopaneng, Amanda Khozi Mukwashi o hatelletse hore ha ho motho ea lokelang ho utloa bohloko. “Litsi tse kang Boiketlong li khutlisa tšepo, li aha seriti, ‘me li bontša hore pholiso e ka etsahala ha sechaba se khetha kutloelo-bohloko.” A bolela joalo. Ka lehlakoreng le leng, ‘Mamoorosi Raditapole ea buileng ka lehlakoreng la Vodacom Lesotho Foundation, o buile ka matla a re:

“Kajeno re khetha ho koala lekhalo le entseng hore baphonyohi ba hloke thuso le toka. Re hana ho ba bamameli ba khutsitseng ha mohlolo oa tthekefetso o ntse o senya bophelo.” O ile a eketsa hore Vodacom Lesotho e ikemiselitse ho tsetela eseng feela

ho a fa tšireletso e tebileng. Boiketlong Multipurpose Centre ke sephetho sa tšebeliso e matla lipakeng tsa Lekala la Tekano, Bacha le Ntšetsopele ea Sechaba, UNFPA, Vodacom Lesotho Foundation, SOS Lesotho, Likhoebo tse Ikemetseng, Mekhatlo ea Sechaba le



mecheng ea marang-rang empa le ka ho matlafatsa bophelo ba batho ba tobaneng le mahlomola. O boletse hore ha Lesotho le ntse le imeloa ke lipalo tse ntseng li phahama tsa tthekefetso, ho buloa ha setsi sena ke mohato o moholo thutong ea ho aha moaho o arabelang lithoko tsa mahlatsipa a tthekefetso le


Batšehetsi ba kantle ho Naha. Setsi se reretsoe ho fana ka tšireletso ea hang-hang le tšehetso ea nako e telele, ho netefatsa hore basali le bana ba ka fumana pholiso, botsitso le boipuso hape. Boiketlong ke sebaka sa tšepo, polokeho le qalo e ncha sebakeng sa mahlatsipa a tthekefetso.



Marena a khahlanong le tthekefetso

Nthabeleng Seitlheko

Ntlo ea Mahosana e tsoaile ketekelelo ea matsatsi a 16 khahlanong le tthekefetso ea basali le bana, ka la 25 Pulungoana monongoaha. Puong ea hae Motlatsi oa Mookameli oa Ntlo ea Mahosana, Monghali Tsututlane Au o itse selemo le selemo, Lesotho joaloka linaha tse ling le keteka letsatsi lena. A re ketekelo ena e qala ka Labobeli la la 25 Pulungoana, ‘me e lebeletsoe ho fela ka la 10 Tšitoe monongoaha. Au o ipilelitse ho banna ho nena tthekefetso ea basali le bana kaha e ithomme pele nako le nako. A re ka la 24 Pulungoana monongoaha, Batlotlehi ba thakhotse setsi seo batho ba hlekefetsoang ba tlang ho ba ho sona ha ba hlekefelitsoe e le ho fumana botšabeli teng. Au o re mosebetsi oo Batlotlehi ba o entseng o bohlokoa, ka hona a ipiletsa ho Marena ho ela mosebetsi oo hloko



le hona ho o tšehetsa. A etsa thapeli ho bahlekefetsi hore ba ke ba fetole mekhoha le boitšoaro ba bona, khahlanong le basali le banana. H’a phethela o itse taba ena ea ho nena tthekefetso ha e felle feela kaha’a matsatsi ana a 16, empa a ipiletsa ho banna hore e lule likelellong tsa bona leha matsatsi ao a se

a fetile. Ka lehlakoreng le leng, Morena oa Sehlooho oa Ha ‘Mamathe, Sempe Masupha o pakile Batlotlehi ka ho etsa mosebetsi o motle oa ho bula setsi, ‘me a ipiletsa ho banna ho fetola mekhoha le boitšoaro malebana le basali le bana kaha litaba tsena li beha seriti sa Lesotho tlokotsing.

A re taba ena ea sekhahla se phahameng sa tthekefetso e boetse e theola le seriti sa Batlotlehi; e boetse hape e ama le moruo oa Lesotho hampe. Morena Masupha o ipilelitse ho banna hore leha ba e-na le mathata ka malapeng ba ke ba lule fatše ba lokise litaba le ba malapa a bona eseng ho ntšetsa bohloko ba bona ho basali le bana. A bontša hore e le Marena ba busa litona-kholo, matona, bakhethoa esita le liofisiri tse kholo, ka hona ba ipiletsa ho motho ka mong oa bona ho leka-lekanya bophelo ba bona, ba qobe ho kenella litabeng tsa tthekefetso. Ho sa le joalo, Morena oa Sehlooho oa Matsieng, Seeiso Bereng Seeiso o itse taba ena e hloka ho tebisetsoa maikutlo, e atameloe ka tsela e tebileng. A re ke taba e bohloko ka ho fetisisa ho bona basali ba le ka pelepele ho hohela basetsana ba ba rekisetsa banna. A re basali ba bang b’a thola ha litaba tsena li ntse li etsahala, ka hoo a ipiletsa

ho bona ho tlaleha tthekefetso ha ba e bona. A re ha motho a hlekefetsa ngoana o mo senyet-sa bokamoso ba bophelo bohle, ka hona a ipiletsa ho bohle ho baballa bana kaha ke bokamoso ba naha ena. Ho sa le joalo, setho sa senate Mofumahali ‘Makholu Moshoeshe o bontšitse hore e le litho tsa ntlo tsa basali ba ntoeng khahlanong le tthekefetso ea basali le bana. O bontšitse hore e le basali ba maparamente ba tlii’o potoloha le naha ena ho ruta batho ka tthekefetso le ho e nena. Moshoeshe o re tthekefetso e nonyetse le moruo oa naha ka kakaretso kaha basali ba se ba tšaba ho sia bana ba bona ba banana le bo-ntat’a bona kaha ba ka ‘na ba ba hlekefetsa. A re ba tšoenyehile ho bona basali, maqhekoana, bana le banana ba hlekefetsoa ka tsela eo ba hlekefetsoang ka eona. Mohoo oa selemo sena ke “kopanang hammoho ho emisa tthekefetso e etsahalang marang-rang khahlanong le basali le banana.”

'Muso o hapa batseteli ba lihotele



Nthabeleng Seithleko

Letona la Lichelete le Ntšetsopele ea Meralo, Dr. Retšelisitsoe Matlanyane o tekile puo holim'a Likhakanyo tsa Bohareng ba Selema (Mid-Term Budget), tsa selema sa Liche-

lete sa 2025/2026, ka la 26 Pulungoana monongoaha.

Batseteli ba tl'o aha lihotele ba tla ka bonyane ba chelete e kaalo ka M34 Milione, 'me Matlanyane o re tšebetso ena ea khaho ea lihotele e tl'o koala likheo tsa mesebetsi, har'a tse ling. O re ho ea ka tlaleho ea

moruo ea IMF ea Mphalane 2025, (IMF, World Economic Outlook), ho lebelletsoe kholo e monyebe ea moruo ka 3.2% ka 2025, le 3.1% ka 2026, 'me hoo ke katleho le ha e le nyenyane papisong le likhoeling tse fetileng.

O re 'muso o ntse o itšetlehile ka boikemisetso ba ona

ba ho tloha ho moruo o etelletsoeng-pele ke 'muso, ho ea ho o khannoang ke mafapha a ikemetseng. O re nako ena ke e hlokolosi haholo, 'me liqeto tseo ba li nkang kajeno ke tse tla bopa bokamoso ba moruo oa naha ena le boiketlo ba sechaba.

A re re lokela ho tsetela haholo boemong ba ho iketsetsa le ho itšireletsa khahlanong le phetoho boemo ba leholimo, le ho tebisa lilekane tsa kantle le ho batla mekhoe e mecha ea khoebo le tšebeliso 'moho.

O re botseteli Mafapheng a Bophelo bo'a ntlafala, moo har'a tse ling 'muso o ntse o thusa khahong ea Litsi tsa Bophelo tsa Qalabane Filter Clinic le Qabane Health Centre, 'me boemo ba boiketlo ba mosebetsi ona bo se bo fetuoe. A re tebello ke hore ho tle ho fano ka sebaka ka molao ka khoeli ea Tšitoe monongoaha, e le hore tšebetso e tle e thakhoee.

O tsoetsepele hore ho matlafatsa bacha e sa le e le taba ea mantlha morerong oa 'muso oa ntšetsopele,

'me a bontša hore morero oa Sebatatso o ile oa ba le 'moka ka khoeli ea Loetse, o keteka khoebo le boqapi.

O re bahoebi ba 30 ba bacha ba ile ba khethoa sebakeng sa Bootcamp le tholisano ea litsiane, moo bahloli ba neng ba il'o emela Lesotho Naheng ea Madagascar har'a tse ling.

Lefapha la naha la merafo lona le ntse le ntlafatsoa le ho hlophua bocha, moo teng selemong sena sa 2025 ho ileng ha tsebahatsoa Basotho ba rafang ka peke le kharafu, e le ho fokotsa likhoqetsane le ho khothaletsa sechaba ho ba le seabo. Ho feta moo, a ipiletsa ho bohle hore ba tlalehe liketsahalo tsa bobolu moo ba li bonang.

O re nakong ena ea tlaleho ea lichelete e bohareng ke litlaleho tse 169 tseo ho fanoeng ka tsona, 'me tse 63 tsa tsona ho ntse ho etsoa lipatlisiso, 'me ke tsa lichelete tse holimo tsa limillione tse kenyeletsang thepa le likoloi, joalo-joalo.

Likhakanyo tsena, li tekoa tlasa mohoo ona "Ho aha maano a kenyeletsang kho- lo ea bohle."

Lihoai li ipeha sekaleng

Nthabeleng Seithleko

Mokhatlo oa Machaba oa Lisebelisoa tsa Boea (IWTO) ho hlaha linaheng tsa tikoloho ea Afrika, o tšoare 'moka oa machaba lekhetlo la pele Naheng ea Lesotho, ka la 25 Pulungoana monongoaha.

'Moka ona o reretsoe ho kopanya lihoai tsa machaba e le ho thakelana ka malebela litabeng tsa tlhahiso ea farelane le seiboko e le hore tlhahiso ea bona e fihlele 'maraka oa machaba esitana le hona ho tseba tlhoko ea 'maraka oo ba fepelang farelane le seiboko ho ona.

Motlatsi oa Tona-Kholo, Justice Nthomeng Majara o hlalositse hore Naha ea Lesotho e motlotlo hore ebe lekhetlo la pele 'moka oa sebopeho sena o tšoareloa ho eona. A re sena ke khatelo pele e kholo ho naha moo e ntse e leka ho iponahatsa mebarakeng ea machaba ea thekiso ea farelane le seiboko ho bona hore na e sebetse joang.

A re ba leboha mokhatlo hore e be o ile oa ikeletsa ho khetha Lesotho ho ba naha e tšoarang 'moka ona, kaha monyetla ona o bontša kamano ea nako e telele e

bileng lipakeng tsa mokhatlo oa bahlahisi ba farelane le seiboko le IWTO.

O bontšitse hore qeto e ileng ea etsoa ke Mopresidente oa IWTO e netefatsa tšepo eo ba nang le eona ho tlhahiso ea boea ea Basotho le litsi tse teng ho ntlafatsa taba ea farelane le seiboko. A toboketsa hore farelane le seiboko ha se taba feela ea boea e tšoarehang empa ke letšoao la borui le ho fa malapa a mangata seriti esita le ho tliša ntlafatso ea lichelete malapeng a joalo.

A re meloko le meloko lihoai tsa Lesotho li bontšitse li tšoare ka matla ho ntlafatsa farelane le seiboko ka makhetha le ka boqhetseke, ka lebaka leo boitelo ba tsona bo ahetsa hore Naha ea Lesotho e elelloe le hona ho tsebahala e le naha e hlaisang boea ba boleng bo phahameng.

Ho feta moo, o hlalositse hore sebopeho le bophahamo ba naha ena bo fana ka monyetla o fapakaneng le linaha tse ling kaha liphoofo tsa Lesotho li sa angoe ke lefu la molomo le maoto ho kenyeletsa le mafu a mang.

A re boemo bona ba bophelo ba liphoofo tsa Lesotho bo tiiselletsa naha ena e bonahale e le naha e ntšetsang pele ho atlehisoa

ha boea ba farelane le seiboko kahare ho selikalikoe sa tlhahiso, 'me e boetse le hlaisa boea ba boleng bo hloekileng.

Ho tla ba le ho hlaisoa ha mokhatlo e tlas'a mokhatlo o moholo oa farelane le seiboko, e le ho bontša tšebetso eo li ileng tsa e etsa ho ntlafatsa tlhahiso kahare ho naha.

O phethetse ka ho hlalosa hore 'muso o ikemiselitse ho kenya linala ho bona hore o etsa menyabuketso ea hore o ntlafatse farelane le seiboko mafapheng a mang le ho boloka libaka tseo boea bo tsoang ho tsona.

Letona la Temo, Kanetso ea Lijo le Phepo e Nepahetseng, Mohlomphehi Thabo Mofosi o hlalositse hore lefapha la farelane le seiboko e ntse e le tšiea e bontšang nalane ea Basotho ka seo ba se hlaisang.

A bontša hore ha e le mona Lesotho le tšoare 'moka oa boemo bona bo phahameng lekhetlo la pele nalaneng ea Lesotho, ke taba eo ho tiisetsoang ka eona ho hola ha lefapha lena le ntlafatso ea tšebeliso e ntle ea mobu le kholo ea moruo.

A re ha se feela boitlamo empa ho na le mesebetsi eo a e etsang kaha Tona-Kholo a bontšitse ka botsamai-

si ba hae hore bahlahisi ba boea ba fuoe tšebetso e hlokalalang hore tlhahiso ea bona e ntlafale.

Mofosi o re boikemisetso ba Tona-Kholo ke hore ntlafatso e fihlele le Basotho ba tlokotsing, ho phahamisa le ho ntlafatsa farelane le seiboko e le ho matlafatsa le balisana kaha ho fumaneha ho le kahare ho ofisi ea hae. O netefalitse hore hona ke kholiseho ea hore ha ho na Mosotho ea lokelang ho sala morao, 'me ho lokela ho ntlafatsoe tlhahiso ea litaba tse amanang le farelane le seiboko.

Mopresidente oa IWTO, Klaus Steger o itse ho bile thata haholo ho fihlela qeto ea hore 'moka ona o tšoareloe Naheng ea Lesotho. A bontša hore e bile lilemo tse 'maloa lihoai li ntse li etsa tlhahiso eo empa li hloloa ke likhetho, 'me lekhetlong lena ba ile ba tšoara ka thata hore likhetho tseo li atlehe.

A re o lumela hore ka 'moka ona ba tla ba monyetleng oa hore thekiso ea boea e nolofale lefatše ho pharalla hobane ho ntse ho e-na le likhoqetsane tse sitisang hore boea ba lihoai bo fihle linaheng tse ling, moo tumelo e leng hore 'maraka o tla ntlafala.

O lebohetsa lihoai tsa Lesotho le linaha tse ling, 'me a re li sebelise 'moka ona ho thakelana ka malebela



ntlheng ea tlhahiso le tlhokomelo e ntle ea boea le likhutšoane.

Molula-Setulo oa Farelane le Seiboko, Mokoenehi Thinyane o bontšitse hore lihoai tsa Lesotho li ikotla sefuba hore ebe lekhetlong lena taba-tabelo ea tsona e arabetsoe.

A re ho lilemo ba ntse ba lakatsa hore ba ke ba tlišo ipekha hore ba eme joang ntlheng ea ho tšoara 'moka oa boemo bona e le lihoai tse hlaisang boea ba boleng bo holimo linaheng tsa tikoloho ea Afrika.

A re ka 'moka ona ba tl'o fumana sethala sa ho bapatsa likhutšoane tse ntlafalitsoeng tseo lihoai li lakatsang ho li hlaisa ho bo-mphato'a bona ho hlaha linaheng tse ling, e le hore ba fumane malebela moo ho lokelang hore ba tiise letsoho teng.

O ipilelitse ho lihoai tsohle tse teng 'mokeng oo ho se be leqe ho theha setsoalle se secha le lihoai tsa linaha tse teng moo kaha seo se tla li bulela monyetla oa mebaraka.

Bohahlauli ke pokello ea moruo



Nthabeleng Seithleko

Ka morero oa ho fetola le ho matlafatsa bohahlauli ba Lesotho, Lekala la Bohahlauli, Lipapali, Bonono le Bochaba le tlabotse selekane (MoU) le African Tourism Board (ATB) ka la 24 Pulungoana monongoaha.

Tšebeliso ena e reretsoe ho potlakisa matsete, ho ntlafatsa papatso ea naha, le ho phahamisa Lesotho hore e be sebaka sa bohahlauli se hlolisang Afrika le lefatše.

Mongoli e Moholo oa Lekala la Bohahlauli, Bonono le Bochaba 'Mantiti Khabo o boletse hore tumellano ena ke qalo ea nako e ncha le leeto le lecha la ho aha bohahlauli bo matla. "Tšebeliso ena e bula tsela ea ho holisa lefapha la bohahlauli, ho tliša matsete metseng ea rona le ho bontša Lesotho e le naha e nang le botle ba tlhaho, setso le maeto a khahlisang." A bolela joalo.

O hlakisitse hore morero o tla thusa ho ntlafatsa papatso ea lefatše ka bophara le ho aha bokhoni ba basebetsi le ba sechaba le ho kopanya Lesotho le libaka tse ling tsa Afrika.

Khabo o boetse a hatisa hore bohahlauli ba sechaba bo tla nka sebaka sa bohlokoa, 'me sena se tla thusa hore batho ba metseng le libakeng tse hole ba fumane melemo ea bohahlauli.

O re lihlahisoa tsena tsa sechaba li tla thusa ho ato-

losa lintho tseo baeti ba ka li etelang ka ntle ho libaka tse tsebahalang tse kang 'Maletsunyane Falls, Thaba-Bosiu le Afriski.

Molula-Setulo oa ATB, Dr. Cuthbert Ncube o totobalitse hore Lesotho "ke lejoe la boleng la Afrika" le nang le setso, mefuta-futa ea tlhaho le libaka tse hohelang, empa ho hloka tšehetso e hlophisitsoeng le ponaleto.

"ATB e ikemiselitse ho tsamaea le Lesotho tseleng ena, ho aha bohahlauli bo matla bo ka hohelang lefatše." A tsoelapele.

O boletse hore MoU e tla boela e matlafatse kamano le meralo ea ntšetsopele ea Afrika, ho kenyeletsoa AfCFTA, moo bohahlauli bo nkoang e le motsamaii oa kholo ea moruo.

ATB e tla thusa ho batla le

ho hokahanya batseteli, ho etsa likopano le ho phahamisa merero ea matsete a kang bolulo ba bohahlauli ba boithabiso (adventure tourism), Libaka tsa setso, bohahlauli ba lithaba, papatso le botumo ba Lesotho (Branding).

Lesotho le tla phahamisoa lipontšong tsa machaba tsa bohahlauli, matšolo a maeto, ho sebelisana le lifofane le ho ntlafatsa setšoantšo sa naha lefatšeng.

Ho tla etsoa koetliso ea sechaba le ea litsebi ho matlafatsa bokhoni ho amohela baeti (hospitality), ho tataisa maeto, bohahlauli bo tsitsitseng le ntšetsopele ea likhoebo tse nyenyane kaha sena se tla thusa haholo bacha, basali le bo-rakhoebobaleha ho ntlafala.

Moemeli oa boeletsi ba ATB, Monghali Slumber

Tsogwane o hlalositse tumellano ena e le mohato o moholo o tla tliša kutloano, botsamaii bo matla le tatai-

ho netefatsa hore mosebetisi ohle o tsitsitse, o tsamaea le litloaello tse molemo tsa lefatše." Ke Tsogwane eo



so e thehiloeng lipakeng tsa linaha tsa Afrika.

"Re tla sebetsa haufi le lekala, sechaba le balekane

O khothalelitse likhoebo tse ikemetseng Lesotho ho nka monyetla ka menyetla e mecha, haholo-holo libakeng tse kang, bohahlauli ba lipapali tsa maemo a phahameng (high-altitude sports), bohahlauli ba bophelo bo botle le Bohahlauli ba tikoloho (eco-tourism).

O re leha Lesotho le na le libaka tse ntle tsa tlhaho le bochaba empa, lefapha bohahlauli le ntse le sa fetohe mohloli o moholo oa chelete ka lebaka la matsete a fokolang le mekhoebo e fokolang ea tšehetso.

Tumellano ena ea tšebeliso 'moho e behile Lesotho tseleng e ncha ea ho aha lefapha bohahlauli le matla, le tsitsitseng le hlalising melemo e tobileng sechaba. Ona ke monyetla oa hore Lesotho le itlathise lefatšeng ka botle ba lona, bochaba, mesebetsi ea matsoho le maeto a bohahlauli a ikhethang.





TSA KEREKE

Ho koaloa Jubilee ea Tšepo

Tšeliso Thakholi

Mokete o moholo oa ho koala Sele-mo sa Jubilee ea Tšepo o neng o bile o kenyelelitse keteke-lo ea Mokete o Moholo oa Kriste-Morena, o ile oa tlotlisoa ka mokoloko oa Kopano ea Masolenyane a Kriste-Morena o neng o tloha 'Mishoneng oa Maria 'Maligrasia, Ha Ratjo-mose ho ea fihla Sethaleng sa Mopapa, Maseru ka la 23 Pu-lungoana monongoaha moo khubu ea mokete ona e ileng ea qala ka Sehlabelo se Ha-

na hantle le tšepile mang? Ara-bang feela ka boikokobetso le re tšepo ea rona e tiileng e sa re phoqeng le har'a matha-ta ke Kriste Morena. Ke eena tšepo ea rona eo re ikabetseng hore re e fe lefatše le se nang eona."

A re tumelong ea rona ha tsohle li felile ho tla sala lintho tse tharo e leng tumelo, tšepo le lerato, 'me e kholo ea lintho tsena tse tharo ke lerato kaha tumelo le lerato li hloka tšepo e le hore li phahame li tsebe ho tsamaea 'moho. A bontša hore tumelo ea rona ke eona e re tsoallang tšepo ena e sa re phoqeng. Ka hona tšepo ea

buoe ka bosebeletsi ba 'nete, moo batho ba nyahameng pelo re nke kano bocha ea hoba bolella hore ha ho e-s'o fele. "Tšepo ke eona e re thusang ho etsa meralo e isang pele."

Motlotlehi Letsie III eena h'a fana ka puo o thoholelitse le ho leboha bohle ba ketekileng le ho ba lipaki tsa mokete oa Jubilee ea Tšepo e etsang na-lane e kholo kahare ho Kereke le naha ka kakaretso. A ipilet-sa ho bohle ho se behe tšepo ea bona ho batho, ho ba ha se kamehla ba tšepahalang, 'me ba na le ho phoqa ka linako tse ling empa ba e behe ho More-na Molimo kamehla hoba eena



lalelang sa 'Missa.

Mokete ona o ileng oa qala ka Sehlabelo se Halalelang sa 'Missa o neng o eteletsoe pele ke Mobishopo oa Qacha's Nek Mohlomphehi Mopeli Joseph Sephamola OMI a tlatsitsoe ke babishopo, moemeli oa IM-BISA, baprista le badiakone, o ne o khobokantse Makatho-like ohle ho hlaha litikolohong tse 'ne tsa Lesotho le kantle ho naha ho tla leboha Morena Molimo haele mona ba koala selemo sa Jubilee ea Tšepo, Morena a ntse a ba sirelelitse le ho ikopela mahlohonolo a selemo se secha sa Kereke.

Khothatsong ea letsatsi leo, Mobabatsehi Tlali Gerard Lerotholi OMI o itse Kriste eo re ikanang ka eena le ho mo latela ke Morena oa marena le Khosi ea likhosi, 'me ha ho na lebitso le leng le amohelehang leo re ka ipitsang ka lona hobane lipakeng tsa Morena Molimo le rona re le batho ke la Kriste a inotši. "Molimo a bokoe!"

A re haeba re tsebile ho kopanya Mokete o Moholo oa Kriste-Morena le tlhola ea ketekelo ea Jubilee ea Tšepo, re il'o bala Lengolong la Pele la Petrose moo ho thoeng, "ha batho ba ntse ba le botsa hore

rona e noesetsoa ke lerato.

"Ha lefatše lena le batlang le re tšosa le re hlokela khotso le toka, se ka lebala hore ho na le ea entseng maholimo le le-



o'a tšepahala a ke ke a ba pho-qa le ka mohla.

Lebitsong la Seboka sa Ba-bishopo ba Kereke e Katholike Lesotho(LCBC), Mobishopo

fatše, 'me o ntse a u bona." O boletse joalo a bile a eketsa ka hore matsatsing ana bohle re bua ka khotso, feela re e batla ho sele, "ke ea le tiisetša sechaba sa heso kantle ho Kriste ha ho khotso. Ke ka hona let-satsing la kajeno re reng Kriste ke eena Morena oa marena le Khosi ea likhosi! Ke eena feela khotso ea rona."

A qetella ka hore bohle ha re tloha mona re nkeng kano bocha ea ho etsa sekoale sa ho ea jala poelano, moo leshano le leng teng re bue 'nete feela, moo bobolu bo leng teng re

John Joale Tihomola HCP o lebohetse Kereke e Katholike ka ketekelo ena e kholo ea letsatsi le leholo la sehopotso sa Khosi ea likhosi, 'me a tiisa 'nete ea hore ha ho khosi e 'ngoe kantle ho Kriste Jesu. A re bohle ke lipaki hobane ba bile le Kriste ho fihlela mona. "Ke ka hoo le ntseng le re o tsa-maile le rona ho fihlela mona." A rialo a bile a ipiletsa ho bohle hore tšepo ena eo re bileng le eona re ke re ahe bocha le ho elelloa hore re ba Molimo, 'me re teng ho mo sebeletsa, ho mo tseba le ho mo rata.

2025-2026 SELEMO A

Sontaha sa 1 sa Advente



Isaia 2:1-5

Pesalema 121

Ba-Roma 13:11-14

Matheus 24:37-44



Khothatso

Tsoha borokong

Kajeno re qala selemo sa Kereke, 'me sena se fa e mong le e mong oa rona monyetla oa ho qala bocha. Nako ena ea Advente ha se ea phomolo kapa ea ho otsela; hobane le lipalo tsa kajeno li re bohle re tsohe borokong. Ka hona ha re qaleng pele ka ho kopa tataiso le thuso ho Morena, kaha ntle ho Eena tsohle tseo re tla li etsa e tla ba lefeela.

Lipalo tsa Advente li re isa nakong eo sechaba sa Morena se neng se lebetse ho tla ha Messia, ka hoo qalehong ea Advente e se eka re palame mochini o re khutlisetsang nakong ea Joannes Mohlatsoi kapa morao ho feta moo; nakong ea baprofeta ba baholo ba Testamente ea Khale. Baprofeta bana ba bile ba bua ka ho tla ha Messia, 'me seo se ile sa tlatsa sechaba ka tšepo bophelong ba sona. Empa rona re tsebile khale ho tla ha hae, ka lebaka lena re tla be re etsa ntho e hloakang moelelo ha re ka etsisa sechaba seo. Potso eo re lokelang ho ipotsa eona ke hore na re phela joaloka batho ba tsebang ho tla ha Mopholosi?

Ntlo e 'ngoe ea baitlami e ne e phela tlasa matšoenyeho a maholo, litšepa tsa kereke li lla empa ho se batho ba tlang, le lipitso tse ncha li le sieo. Haufi le eona ho ne ho lula monna-moholo ea rapelang haholo oa moruti. Ka let-satsi le leng motsamaisi oa ntlo ea baitlami a rera ho mo etela kaha bohle ba ne ba shebile ho nka mohlala ho eena. A mo amohela joalokaha eka es-ale a mo lebeletse, 'me bobeli ba lula fatše ba qoqa, ba bala mangolo; empa qetellong monna-moholo a re ho motsamaisi; "Ke rata ho u bolella ntho e le 'ngoe feela, 'me ke tla e bua hanngoe ntle ho le botsoa kapa khanyetso ea letho: 'bolella bana b'eno hore Kriste o phela har'a lona.'"

Motsamaisi a fetisa molaetsa ka moo o leng ka teng, 'me litho tsa ntlo tsa ipotsa lipotso tse ngata haholo: "Ebe Br. John ke eena Messia? Ebe Messia ke 'Na?' kamor'a tsena tsohle ba qalella ho fetola bophelo ba bona, ba phelisa ka khotso, lerato le kutloelo-bohloko. Sechaba sa hlokomela phe-toho ena 'me sa qalella ho tla kerekeng, le bahlankana ba khahloa ho ba karolo ea baitlami bana ba phelisanang hamonate. Baitlami bana ba fetoha mohlala o motle oa tumelo, tšepo le lerato ho bohle ba phelang haufi le bona.

Re lebeletse ho tla ha Kriste la ho qetela, 'me molaetsa oa Advente o hlakile; 'ho tla ha Messia'. Ha re hopoleng hore O ile a tla 'me o phela har'a rona, hobane ha re ka lahlehelo ke ho phela tumelo re tla tšoana le baitlami bao. Re ka lahlehelo ke moea, empa ho feta tsohle ke tšepo eo Mokriste ea e hloakang a tšoanang le lehoatata. Ha re hetla morao re leboha tsohle tseo re leng majalefa a tsona; re majalefa a litšepiso tse ileng tsa fuoa baprofeta. Morena Jesu h'a bua le barutuo ba hae o re: "Ba bangata ba ile ba khalla ho bona tseo le li bonang empa h'a ba ka ba li bona, ho utloa tseo le li utloang empa h'a ba ka ba li utloa." O buile tsena hobane ba ne ba hloka tumelo. Lipalo tsa Advente li re thusa ho lemoha lintho tse kholo tseo re li fuoang ka Kriste Messia oa rona.

Ha re'a lokela ho phela bophelo ba khale, re tlameha ho phela se teng ha joale ka ho lumela hore Kriste o teng har'a rona joaloka Messia; re ntse re lebeletse ho khutla ha hae la bobeli. Ka hona re lokela ho sebeletsa Morena ka lipelo tse tiileng, re bontše bophelo, re hlaphoheloe borokong, re be mafolofolo mesebetsing eohle e metle ea tumelo joaloka monga rona Jesu Kriste. Haeba ho na le batho bao boteng ba Kriste bo sa reng letho ho bona, mosebetsi oa rona ke oo: ho etsa bonnete ba hore Kriste o ba teng ho bohle ba sa kholoeng le ba sa lumeleng. Empa ho bohlokoa ke bophelo ba Sekriste bo tletseng lerato, thabo le tšepo tse thusang ba hole ho bona khanya.

Bahalaleli har'a Beke

1	Tšitoe	Eligius
2	Tšitoe	Bibiana
3	Tšitoe	Abbo
4	Tšitoe	Ada
5	Tšitoe	Sabas
6	Tšitoe	Asella

Ba nyoretsoe Soweto Marathon



Tšeliso Thakholi

Ho tla be ho lubehile haholo Naheng ea Afrika Boroa ka Moqebelo oa la 29 Pulungoana monongoaha ha limathi ho hlaha ka likanta tsohle tsa lefatše, li tla be li nkhisetsana mahafi lebelong

la selemo le selemo la bo-30 la botelele ba 42.2km le leholohali Tikolohong e ka Boroa ea Afrika la Soweto Marathon.

Ngoahola lebelo lena le ne le haptjoe ke Onalenna Khonkhobe oa Afrika Boroa ka nako ea 2:18:36, ha bobeling e bile Khoarahlane Seutloali ka nako ea 2:18:54. Athe mae-mong a leshome e ne e le Jobo Khatoane ka nako ea 2:22:48. Ka selemo sa

2023 Khatoane o ne a etse nalane lebelong lena ka ho hlaha maemong a bohloko ka nako ea 2:21:17.

Haele ka ho basali 'Neheng Khatala e bile eena mohloli oa lebelo lena ngoahola ka nako ea 2:43:07 ha bobeling e bile moroetsana ea kotsi haholo mabelong a matelele e leng Irvette van Zyl oa Naha ea Afrika Boroa. Ba hlalileng maemong a pele ka ho banna le ka ho basali bane ba ikhapele matsebe-tsebe a chelete e kalo ka M250,000.00 semathi ka seng.

Khatoane le Khatala ba se ba mathile mabelo a 'maloa a matelele Naheng ea Afrika Boroa le mose ho maatlale, 'me le selemong sena bona 'moho le sehlopha sa limathi tsa Lesotho tse seng li le malala-a-laotsoe ho tla matha lebelo lena, ba tšepisitse sechaba sa Basotho ho tla le tlhoho. Ba re ho latela boikoetliso ba bona bo matla haholo kaha ba hli-le ba tšoare ka thata haholo e le sehlopha sa Lesotho sa mabelo a matelele.

"Boikoetliso ba rona ntate bo ntse bo tsamaea hantle ka mokhoa oo re hlophileng ka teng, 'me ha re bone hore na re ka hloloa ke'ng ho kena kahar'a limathi tse 10 tse tla tsoa khoeleng pele."



Ba rialo ba bile ba eketsa ka hore moea o renang hajoale boikoetlisong ke oa ho tlela Basotho tlhoho. "E mong le e mong oa rona o batla hore a tle a be kahar'a ba leshome ba pele, 'me ha re le kahar'a ba leshome ho se ho le bonolo ho hlaha mae-mong a pele." Ba rialo.

Ba re ba ikoetlisa ka bon-

ngoe le ka sehlopha libakeng tse fapakaneng. Ba qetella ka ho ipiletsa ho Basotho bohle ho ba tšehetsa ka lithapelo hore ba tle ba atlehe ho ikhapela tlhoho. Lebelo lena la Soweto Marathon monongoaha le kenetsoe ke limathi tse ka bang 25,000 lefatše ka bophara.

Moore ke mohloli e mocha

Tšeliso Thakholi

Letsoalloa la Naha ea Afrika Boroa James Moore ke mohloli e mocha oa mo-jao o moholo oa selemo le selemo oa Roof of Africa mokhahlelong o ka holimo-limo oa khau ea Khauta, lekhetlo la pele kamor'a ho hlola Wade Young ea neng a se a entse nalane ka ho hapa lebelo lena makhetlo a robeli ka talellano. Mojaong ona o thakhohileng ka la 22 Pulungoana monongoaha Young o hlalile maemong a bohloko.

Ka Moqebelo oa la 22 Pulungoana, mojaong o ile oa thakhoha sebakeng sa Ha Lebamang tikolohong ea Roma ka mekhahlelo e mene kaofela e leng Iron, Bronze, Silver le Gold. Mokhahlelong o moholo o neng o shebiloe ka mahlo

a nchocho ke moo James Moore a ileng a makatsa mohloli ea neng a sireletsa sekola e leng Wade Young ka ho itsamaela bolacha. Moore o entse ka kakaretso nako ea 10:42:08.

Boemong ba bobeli e bile Lettenbichler Manuel ea khannelang KTM Factory Racing ho tsoa Naheng ea Germany ka kakaretso ea 10:44:00 a ikhapela Khau ea Silver. Manuel eena o ntse a sirelelitse boemo ba hae ba bobeli ka katleho e kholo le monongoaha. Borarong e bile Bolt Billy ka kakaretso ea nako ea 10:48:00 ho tsoa Naheng ea United Kingdom ea ileng a hapa Khau ea Bronze.

Haele lipalami tsa Naha ea Lesotho tse tummeng ka ho sebetsa ka thata mojaong ona tse kang Tumello Tšolo, Sechaba Chabeli, Be-sele Malakane le Shadeer Moosa, tse neng li kenetse lebelo li hliile tsa hula ntoa ka lithako tsa morao kaha li

hlotsoe ho tlela naha le ha e se e le khau ea Silver feela.

Ka selemo sa 2022 ho isa 2023 sepalami sa Lesotho se neng se sebetse hantle e bile Shadeer Moosa ka ho hapa khau Mokhahlelong oa Bronze, moo a ileng a tsoa boemong ba bo 14 ka nako ea lihora tse tšeletseng

kaofela. Batšehetsi ba hae ba ne ba e-na le tšepo ea hore le monongoaha o tla sebetsa hantle empa ntoea e ile ea mo hlola e sale qalong ea mojaong.

Pejana ho mojaong lipalami tsa Lesotho li ne li ile tsa bontša ho li thabetse mojaong ona haholo le ha o le boima

ka lebaka la maemo a libaka tseo o mathelang ho ona. Ba re ngoahola ba bang ba ile ba sitoa ho qeta mojaong, 'me tšepo e ne e le hore monongoaha ba tla sebetsa hantle. Ba bile ba liella ka ho leboha Mokhatlo oa Lesotho oa Lithuthuthu (LORA) ka ho kenya letsoho le toma hore mojaong ona o kenngoe kahar'a mejao e meholo ea lefatše.



Lijabatho e teteka LUFC

Tšeliso Thakholi

Sehlopha sa Lijabatho 'Mahala' ka moo se reneketsoang ka teng, se hlotse sa Limkokwing University FC (LUFC) ka 2-0 papaling ea Liki e Kholo ea Vodacom e neng e bapalloa Ha Ratjomose, Maseru ka Sontaha sa la 23 Pulungoana 2025.

Lijabatho e ile ea hla ea tsohela LUFC matla ka ho hlaba ntlha metsotsong e 23 papali e qalile ka leoto la Lekhooa 'Mlani' Hlaele. Ntlha ena ea Lijabatho e tliile kamor'a nelehetsano e makhetha ea bolo e ileng ea tloha moleng o kamorao oa lepheo le letšehali ka leoto la Bokang Sello, 'me ea fetela bohareng ba lebala moo e ileng ea fumana Tumelo Makhopo eba e fihla kahare ho lebokose le leholo la mekoallo ea LUFC, moo Mlani a ileng a e hakisaletlooa ha bobebe kaha sethibathibane sa LUFC se ile sa lahleha haholo nakong eo ho neng ho raheloa bolo eo ka letanteng.

Ntlha ea bobeli ea Mahala eona e kene metsotsong e 58 karolong ea bobeli ea papali ka leoto la Msechi Klassen. Le eona eo e ntse e le nelehetsano e ntle ea libapali tsa mola o kamorao ho ea ho o kapele oa Lijabatho moo Klassen a ileng a nka bolo a e phutlanya le letanta.

Kamorao ho mona lihlopha ka bobeli li qalile karolo ea bobeli ka sekahla se batlang se lekana. Phapano e neng e bonahala ke hore libapali tsa Lijabatho li ne li atleha ho nelehetsana bolo ka tsela e nepahetseng. Ha ka lehlakoreng la LUFC teng bothata e ne e le hore tse ling tsa libapali tsa bona li ne li bonahala mokhathalla o se o iphile matla, li se li lahlile tsela eo li neng li bapala ka eona le ho se fihle libakeng tse hlokaahalang nakong eo li neng li tsoere bolo.

Lijabatho e khutlile e se e le kotsi karolong ena ea bobeli ea papali moo bahlankana ba neng ba e hata ba e hatooa. Empa le ha le joalo, LUFC e ile ea 'na ea leka ho phunya lebota le kamorao la Lijabatho le neng le ahiloe ka libapali tse matla haholo empa ba hloleha. LUFC e bapetse karolo e kholo ea ho qetela ea papali ka libapali tse robong kamor'a hore sebakali sa eona se bapalang morao se fuoe karete e khubelu ka



lebaka la ho bapala Tumelo Khutlang ha bohlasoa, e le h'a ne a se a tsoile tjaro ea mabonooa ho ea hlaba ntlha ea boraro.

LUFC e ile ea sitoa ho sebelisa monyetla e mengata

eo e ileng ea e fumana ea ho hlaba lintlha. E ne e lokele hore ebe e hlabile lintlha tse 'maloo tse ntle ho latelela monyetla eo e bileng le eona kapel'a lipalo tsa Lijabatho, empa e ile ea hlole-

ha ho fihlela papali e fihla pheletsong.

Lipapaling tse ling tsa Liki e Kholo tse bapetseng ke moo Machokha e ileng ea makatsa ba bangata ha e ne e bapala ka ho leka-

na le LDF 'Sohle Sohle' ka 0-0, Bantu ea shapa Members 4-0, Lifofane ea sasara LMPS 'Semonye' ka thupa ea 3-2 ha Majantja e ntseng e li hula pele lokong e ile ea masola Maroala 3-1.

All Aces e ntoeng

Tšeliso Thakholi

Mokoetlisi oa sehlopha se sa tsoa kena lihlopheng tse ka Boroa tsa A Division All Aces, Monghali Retšelisitsoe Matsepe o re leha e le mona ba lahlehetsoe ke papali ea bona ea bobeli ea Liki kamor'a ho hloloa ke Swallows 2-0 ka Moqebelo o tsoa feta, morero ke hore ha ba koala selemo ba be ba le kahare ho lihlopha tse 'ne tse ka holimo lokong kaha ba saletsoe ke lipapali tse 'ne pele selemo sena se kolumela.

O buile tsena kamor'a papali ea bona le sehlopha sa Swallows, e bileng Lebaleng la Swallows ka la 22 Pulungoana monongoaha moo a ileng a bontša hore ba qalile lipapali tsa bona tsa liki ba sebetsa hantle haholo kaha hang e itse ha ba qeta ho kena kahare ho Liki ea A Division ho tsoa mokhahlelong o katlase oa B Division, ba ile ba matlafatsa sehlopha sa bona likarolong tse fapakaneng tsa kahare ho lebala ka tse ling tsa libapali tse neng li ntse li bapala ho A Division, e le hore e tle se ke ea re ba sa fihla feela ba iphumana ba fetohile ntetekeng ngoan'a motšoare o otloa ke

bohle.

A re ntlha e 'ngoe ea bohlokoa e ileng ea ba thusa ho sebetsa hantle e sa le sethathong ke hore boholo ba lihlopha tseo ba qalileng ho qothisana lehlokoa le tsona, li ne li sa ba tsebe kaha ba sa le bacha. A re leha ba hlotsoe ho fihlela ha joale ba ntse ba tliil'o tsitsa kahare ho Liki ea A Division, 'me lipapaling tsena tsa bona tse 'ne tse setseng ba tliil'o sebetsa ka thata haholo ho li hapa.

A supa hore ba se ba hla-kometse hore morao tjena lihlopha ha li tla ho bona ho se ho fapakaneng le pele ha li ne li sa ba tsebe hantle, 'me li se li tla ka kelello ea hore e hlile ba bacha Liking mona. "Ka hona tsela eo ba re atamelang ka eona e se e fapakaneng le ea ha re ne re qala.

Le tsona li'a bontša hore re ba fumana mona." O bole-tse joalo a bile a eketsa ka hore ba se ba tlameha hore joalokaha ba ile ba sebetsa ka thata ba se ke ba phomola ho hang. "Le tsona li se li qalile hore bontša hore rea fihla kahare ho Liki." A rialo.



A tiisa hore ba tliil'o se-beletsa hore ba be ba le ka-hare ho lihlopha tse 'ne tse ka holimo. A re ho ea fihla maemong a pele le a bobeli ba se ba tla laoloa ke hore na tse kapele ho bona li tla be li sebelitse joang, "empa le tsona ha li ka tsa khibela li ntse li re fa monyetla oa ho nyolohela ka holimo Lokong."

H'a lokolisa ka bokhutšoanyane mabaka a seng makae a entseng hore ba lahleheloe ke papali ea bona khahlanong le

Swallows, o itse Swallows e ile ea sebelisa monyetla oa lebala la bona ka ho neheletsana libolo le ho tsoara bolo nako e ngata. "Joale rona re ba fa monyetla oa ho bapala le tlhompho e senyekhe-nyekhe haholo e sa hlokaahaleng. Bothata bo bong ba rona e ne e le hore re batla ho e bapala le moo maemo a neng a sa lumele." A rialo.

A qetella ka hore ba tliil'o lokisa liphoso tseo ba ileng ba li etsa e le hore ba tsebe ho tsoelapele ka katleho ka morero oa bona oa ho phethela selemo sena ba le kahar'a tse 'ne tse ka holimo. All Aces hajoale e theohetse boemong ba bohloko ka ho bapala lipapali se tšeletseng ea hlola tse tharo, ea bapala ka ho lekana ho e le 'ngoe, ea lahleheloe ke tse peli 'me e na le lintlha-kholo tse leshome ka mokotleng.





Across

- 1 Moketjana oa ho leboha basali ba neng ba sala le motsoetse e mocha (6)
- 3 Linku tse leshome ha ho thethesoa bohali. (7)
- 4 Mekhoa le litloaelo tsa sechaba. (2)
- 6 Mosali oa bobeli kapa ho feta lenyalong la sethepu. (7)
- 9 Ngoan'abo mosali oa ka. (5)
- 10 Joala bo nooang ha ho isoa likhomo tsa Mahali. (4)
- 11 'Mantja, Matšelis, Tšelis, Ntja le Mpe; mabitso ana a rehoa..... (6)
- 13 Pitsi e qhobang likhomo tsa bohali. (8)
- 17 Maqothoane a sebete le moholu a phehelletsoeng 'moho. A jeoa ke maqhekoana a habo banyalani. (7)
- 20 se chekoa ke pelo (Maele). (7)
- 21 Sefaha se roesoang ngoana e monyenyanane molaleng ka tumelo ea ho mo tiisa khahlanong le meea e mebe. (7)
- 22 Kobo ea bohali. (11)
- 23 Mosali ea nyetsoeng, ke eng habo monna oa hae? (7)
- 24 Thakana ea bashanyana. (8)

Down

- 2 Ngoana ea se nang motsoali. (8)
- 5 Ntlo ea banyalani ba bacha. (7)
- 7 Ho bontša ngoana khoeli e phethileng sekhoanana ka mora khoeli tse tharo a hlahile. (8)
- 8 Ha lea tlala, le (nakong ea bohali). (6)
- 12 Monna ea nyetseng morali oa rona.(11)

- 14 Basali ba mophatong. (10)
- 15 Mosali ea nyetsoeng ke monna oa ausi oa hae. (7)
- 16 Khomo e hlabeleang lingoetsi ha li felehelitse ngoetsi e ncha. (8)
- 17 Mofuta o mong oa nama e tharising lekoko. (8)
- 18 Khoeli eo ngoetsi e tlotsoeng ke khoeli ka eona. (7)
- 19 Khomo e kopanyang malapa a mabeli ka lenyalo. (6)

THAROLLO

MoB 93-4612

